

新出資料

大文豪家南海吳趼人君肖影并墨寶

還我魂靈記

我佛山人

『漢口中西報』庚戌六月十六日（1910年7月22日）1493號

凡人必不免於死者軀殼可以不死者魂靈魂靈存而軀殼奄化雖死猶生軀殼存而魂靈漸滅雖生猶死吾之爲是言也人或疑之大抵魂靈之說不一有以著述技巧嘉言懿行可傳於後世之事業爲魂靈者有以宗支衍蔓子孫蕃庶爲魂靈者宗教家且有魂靈升天堂入地獄之說余均以爲不然蓋以上諸云云皆於吾軀殼之外別爲一物者也軀殼我所有也魂靈亦我所有也以一我而統是二者是二者必相依附而不可須臾離者也或曰軀殼得而見者也魂靈不可得而見者也二者之不可須臾離何從而知之則曰精神者魂靈之發見者也傳述後世蕃衍子孫莫非魂靈爲之即莫非精神爲之魂靈雖不可見而精神可見精神雖不可見而精神之作用可見魂靈於軀殼不可須臾離云者質言之即軀殼與精神不可須臾離也精神未必果與軀殼離然有時或困乏焉或消滅焉其去離也亦不遠矣吾生而精神壯足未弱冠即出與海內士大夫周旋歷壯處境艱窘僅以筆墨謀生活嘔心吐血者十餘年積久而精神漸困昔之下筆洋洋焉者浸假而文思苦澀昔之終日不倦者浸假而少動即疲質諸醫者謂宜節勞顧勞者吾衣食之資本也曰節勞是猶節吾衣食耳勞不可節而困頓愈甚困頓愈甚而精神愈短少是精神將離吾軀殼以去矣將成一雖生猶死之人矣而醫者仍持節勞之說曰非是且不藥不覺怒焉憂之近與老友黃礎玖告以所苦礎玖曰吾有艾羅補腦汁盍姑試之饋我數瓶服之覺其甘如飴不知其有效否也姑服之云爾數日後復遇礎玖戲謂之曰藥無効奈何礎玖曰豚蹄孟酒而祝滿篝滿車者其子之謂乎姑盡所饋如其言而求効之心孔殷服久之不知其効所在猶以爲無効也然而文思不澀矣勞久不倦矣以視往昔之精神且有加焉顧所饋藥猶未盡也噫異矣謂非藥之効不可得也然而取効始於何曰吾不知也循是以往効果之極至於何似尤非吾所知

